



白氏文集卷第二十一

後序

前三年元微之為予編次文集而叙之凡五秩每秩十卷訖長慶二年冬號白氏長慶集邇來復有格詩律詩碑誌序記表贊以類相附合為卷軸又從五十以降卷而第之是時大和二年秋予春秋五十有七目昏頭白衰也久矣拙音狂句亦已多矣由茲而後宜其絕筆若餘習未盡時時一詠亦不自知也因附前集報微之故復序于卷首云爾

格詩訶行雜體

五十
七首

郡齋旬假命宴呈座客示郡寮

自此後在蘇州作

公門日兩衙公假月三旬衙用决簿領旬以會親賓

公多及私少勞逸常不均况為劇郡長安得閒宴頗
下車已二月開筵始今晨初黔軍厨突一拂郡榻塵
既備獻酬禮亦具水陸珍萍醅箬溪醕水鱸松江鱗
侑食樂懸動佐懽妓席陳風流吳中客佳麗江南人
歌節點隨袂舞香遺在茵清奏凝未闋醜顏氣已春
衆賓勿遽起群寮且逡巡無輕一日醉用犒九日勤
微彼九日勤何以治吾民微此一日醉何以樂吾身

題西亭

朝亦視簿書暮亦視簿書簿書視未竟蟋蟀鳴座隅
始覺芳歲晚復嗟塵務拘西園景多暇可以少躊躕
池鳥澹容與橋柳高扶踈烟蔓嫋青萍水花披白蘂
何人造茲亭華敞綽有餘四簷軒鳥翅複屋羅蜘蛛

直廊抵曲房窈窕深且虛脩竹夾左右清風來徐徐
此宜宴嘉賓鼓瑟吹笙竿荒淫即不可廢曠將何如
幸有酒與樂及時歡且娛忽其解郡印他人來此居

郡中西園

閒園多芳草春夏香靡靡深樹足佳禽旦暮鳴不已
院門閉松竹庭徑穿蘭芷愛彼池上橋獨來聊徙倚
魚依藻長樂鷗見人暫起有時舟隨風盡日蓮照水
誰知郡府內景物間如此始悟諠靜緣何嘗繫遠邇

北亭卧

樹綠晚陰合池涼朝氣清蓮開有佳色鶴唳無凡聲
唯此閒寂境愜我幽獨情病假十五日十日卧茲亭
明朝吏呼起還復視黎甿

一葉落

煩暑鬱未退涼飈潛已起寒溫與盛衰遞相爲表裡
蕭蕭秋林下一葉忽先委勿言微搖落搖落從此始
崔湖州贈紅石琴薦煥如錦文無以荅之以

詩酬謝

頽錦支綠綺韻同相感深千年古澗石八月秋堂琴
引出山水思助成金玉音人間無可比比我與君心
九日宴集醉題郡樓兼呈周殷二判官

前年九日餘杭郡呼賓命宴虛白堂去年九日到東
洛今年九日來吳鄉兩蓬髮一時白三處菊花同
色黃一日日知添老病一年年覺惜重陽江南九月
未搖落柳青蒲綠稻穗香姑蘇臺謝倚蒼靄太湖山

水含清光可憐假日好天色公門吏靜風景涼榜舟
鞭馬取賓客掃樓拂席排壺觴胡琴錚鏦指撥刺吳
娃美麗眉眼長笙歌一曲思凝絕金鈿再拜光低昂
日脚欲落備燈燭風頭漸高加酒漿觥盞灑翻首
葉舞鬢擺落茱萸房半酣憑檻起四顧七堰八門十
六坊遠近高低寺間出東西南北橋相望水道脉分
棹鱗次里閭碁布城冊方人烟樹色無隙罅十里一
片青茫茫自問有何才與政高廳大館居中央銅魚
今乃澤國節刺史是古吳都王郊無戎馬郡無事門
有祭戟腰有章盛時儻來合慚愧壯歲忽去還感傷
從事醒歸應不可使君醉倒亦何妨請君停杯聽我
語此語真實非虛狂五旬已過不爲天七十爲期蓋

是常須知菊酒登高會從此多無二十場

同微之贈別郭虛舟鍊師五十韻

我爲江司馬君爲荆判司俱當愁悴日始識虛舟師
師年三十餘白晢好容儀專心在泐永餘力工琴棋
靜彈絃數聲閒飲酒一卮因指塵土下蜉蝣良可悲
不聞姑射上千歲冰雪肌不見遼城外古今塚纍纍
嗟我天地間有術人莫知得可逃死籍不唯走三尸
授我叅同契其辭妙且微六一悶扃鑰子午守雄雌
我讀隨日悟心中了無疑黃芽與紫車謂其坐致之
自負因自歎人生號男兒若不珮金印即合翳玉芝
高謝人間世深結山中期泥壇方合矩鑄鼎圓中規
鑪橐一以動瑞氣紅輝輝齊心獨歎拜中夜偷一窺

二物正訢合厥狀何怪竒綢繆夫婦體狎獵魚龍姿
簡寂館鍾後紫霄峯曉時心塵未淨潔火候遂參差
萬壽覬刀圭千功失毫釐先生彈指起姹女隨烟飛
始知緣會間陰隲不可移藥竈今夕罷詔書明日追
追我復追君次第承恩私官雖小大殊同立白玉墀
我直紫微闕手進賞罰詞君侍玉皇座口含生殺機
直窮易媒孽浮俗多瑕疵轉徙今安在越嶠吳江湄
一提支郡印一建連帥旗何言四百里不見如天涯
秋風旦夕來白日西南馳雪霜各滿髮朱紫徒爲衣
師從廬山洞訪舊來於期尋君又覓我風馭紛逶迤
帔裾曳黃絹鬚髮垂青絲逢人但斂手問道亦頷頤
孤雲難久留十日告將歸欵曲話平昔殷勤勉衰羸

後會杳何許前日磷緇俗家無異物何以充別資
素牋一百句題附元家詩朱頂鶴一隻與師雲間騎
雲間鶴背上故情若相思時時摘一句唱作步虛辭

霓裳羽衣歌和微

我昔元和侍憲皇曾陪內宴宴昭陽十歌百舞不可
數就中家愛霓裳舞舞時寒食春風天王鈎欄下香
案前案前舞者顏如玉不着人家俗衣服虹裳霞帔
步搖冠鈿瓔纍纍珮珊珊娉婷似不任羅綺顧聽樂
懸行復止聲蕭竽笛遞相攬擊擗彈吹聲邈迤凡法
初衆樂不齊唯金石絲竹次散序六奏未動衣陽臺
宿雲慵不飛散序六遍無舞也中序擘騏初入拍秋竹竿
裂春冰拆中序始有拍亦名拍序飄然轉旋迴雪輕嫣然縱送

游龍驚小垂手後柳無力斜曳裾時雲欲生四句皆霓裳舞

之初烟蛾歛略不勝態風袖低昂如有情上元點鬢

招萼綠王母揮袂別飛瓊許飛瓊萼綠華皆女仙也繁音急節十

二遍跳珠撼玉何鏗錚霓裳曲十遍而終翔鸞舞了却收翅

唳鶴曲終長引聲凡曲將畢皆聲拍促速唯當時乍

見驚心目凝視諦聽殊未足一落人間八九平耳冷

不曾聞此曲湓城但聽山魈語巴峽唯聞杜鵑哭子

江州司馬轉忠州刺史移領錢塘第二年始有心情問絲竹玲

瓏篴篥謝好箏陳寵感栗沈平笙清絃脆管纖纖手

教得霓裳一曲成自玲瓏已下皆杭之妓名虛白亭前湖水畔前

後祗應三度按便除度子拋却來聞道如今各星散

今年五月至蘇州朝鐘暮角催白頭貪看案牘常侵

夜不聽笙歌直到秋秋來無事多閒悶忽憶霓裳無
 處問聞君部內多樂徒問有霓裳舞者無答云十縣
 十萬戶無人知有霓裳舞唯寄長歌與我來題作霓
 裳羽衣譜四幅花牋碧紅霓裳實錄在其中千姿
 萬狀分明見恰與昭陽舞者同眼前髣髴覩形質昔
 日今朝想如一疑從魂夢呼召來似著丹青圖寫出
 我愛霓裳君合知發於歌詠形於詩君不見我歌云
 驚破霓裳羽衣曲長恨歌云又不見我詩云曲愛霓裳未
 拍時錢塘詩云由來能事皆有主楊氏創聲君造譜開元
京府節度揚敬述造君言此舞難得人湏是傾城可憐女吳妖
 小玉飛作烟夫差女小玉死後形見於王越艷西施
 化為土嬌花巧笑又寂寥娃館苧羅空處所如君所

言誠有是君試從容聽我語若求國色始翻傳但恐
 人間廢此舞妍蚩優劣寧相遠大都只在人擡舉李
 娟張態君莫嫌亦擬隨宜且教取娟態蘇妓之名

小童薛陽陶吹簫築歌和浙西李大夫作

剪削乾蘆插寒竹九孔漏聲五音足近來吹者誰得
 名關雉老死李生衮今又老誰其嗣薛氏樂重年
 十二指點之下師授聲含嚼之間天與氣潤州城高
 霜月明吟霜思月欲發聲山頭江底何悄悄猿聲不
 喘魚龍聽翕然聲作疑管裂訕然聲盡疑刀截有時
 婉軟無筋骨有時頓挫生稜節急聲圓轉促不斷轆
 轤鞞鞞似珠貫緩聲展引長有條有條直直如筆描
 下聲乍墜石沉重高聲忽舉雲飄蕭明旦公堂陳宴

席主人命樂娛賓客碎絲細竹徒紛紛宮調一聲雄
出羣衆音靦縷不落道有如部伍隨將軍嗟爾陽陶
方稚齒下手發聲已如此若教頭白吹不休但恐聲
名壓關李

啄木曲

莫買寶剪刀虛費千金直我有心中愁知君剪不得
莫磨解結錐虛勞人氣力我有腸中結知君解不得
莫染紅絲線徒誇好顏色我有雙淚珠知君穿不得
莫近紅爐火炎氣徒相逼我有兩鬢霜知君消不得
刀不能剪心愁錐不能解腸結線不能穿淚珠火不
能銷鬢雪不如飲此神聖杯萬念千憂一時歇

題靈巖寺

寺即吳館娃宮鳴榭廊
觀池採香徑遺跡在焉

娃宮榭廊尋已傾觀池香徑又欲平二三月時但草
綠幾百年來空月明使君雖老頗多思携觴領妓處
處行今愁古恨入絲竹一曲涼州無限情直自當時
到今日中間歌吹更無聲

雙石

蒼然兩片石厥狀怪且醜俗用無所堪時人嫌不取
結從眙渾始得自洞庭口萬古遺水濱一朝入吾手
擔舁來郡內洗刷去泥垢孔黑烟痕深罅青苔色厚
老蛟蟠作足古劍插爲首忽疑天上落不似人間有
一可支吾琴一可貯吾酒峭絕高數尺坳泓容一斗
五絃倚其左一杯置其右窪樽酌未空玉山頽已久
人皆有所好物各求其偶漸恐少年腸不容垂白叟

迴頭問雙石能伴老夫否石雖不能言許我為三友

宿東亭曉興

温温土爐火耿耿紗籠燭獨抱一張琴夜入東齋宿
窓聲渡殘漏簾影浮初旭頭癢曉梳多眼昏春睡足
負暄簷宇下散步池塘曲南鴈去未迴東風來何速
雪依瓦溝白草遶牆根綠何言萬戶州太守常幽獨

日漸長贈周殷二判官

日漸長春尚早墻頭半露紅萼枝池岸新鋪綠芽草
蹋草攀枝仰頭歎何人知此春懷抱年顏盛壯名未
成官職欲高身已老萬莖白髮真堪恨一片緋衫何
足道賴得君來勸一杯愁開悶破心頭好

花前歎

前歲花前五十二今年花前五十五歲課年功頭髮

知從霜成雪君看取

五年前在杭州有詩云五十二人頭似霜

幾人得老

莫自嫌樊李吳韋盡成土

樊絳州吳蕘州

宗師李諫議景倫

往還相次

南州桃李北州梅且喜年年作花主花前置

酒誰相勸容坐唱歌滿起舞

容滿皆欲散重拈花細

看爭知明日無風雨

自詠五首

朝亦隨群動暮亦隨羣動榮華瞬息間求得將何用
形骸與冠蓋假合相戲弄何異睡著人不知夢是夢

二

一家五十口一郡十萬戶出為差科頭入為衣食主
水旱合心憂飢寒湏手撫何異食麥蟲不知苦是苦

三

公私頗多事衰憊殊少歡迎送賓客懶鞭笞黎庶難
老耳倦聲樂病口厭杯盤既無可戀者何以不休官

四

一日復一日自問何留滯為貪逐日俸擬作歸田計
亦須隨豐約可得無限劑若待足始休休官在何歲

五

官舍非我廬官園非我樹洛中有小宅渭上有別墅
既無婚嫁累幸有歸休處歸去誠已遲猶勝不歸去
和微之聽妻彈別鶴操因為解釋其義依韻

加四句

義重莫若妻生離不如死誓將死同穴其柰生無子

商陵追禮教婦出不能止舅姑明旦辭夫妻中夜起
起聞雙鶴別若與人相似聽其悲唳聲亦如不得已
青田八九月遼城一萬里徘徊去住雲嗚咽東西水
寫之在琴曲聽者酸心髓况當秋月彈先入憂人耳
怨抑掩朱絃沉吟停玉指一聞無兒歎相念兩如此
無兒雖薄命有妻偕老矣幸免生別離猶勝商陵氏
題故元少尹集後二首

黃壤詎知我白頭徒憶君唯將老年淚一洒故人文
遺文三十軸軸軸金玉聲龍門原上土埋骨不埋名

和微之四月一日作

四月一日天花稀葉陰薄泥新燕影忙蜜熟蜂聲樂
麥風低冉冉稻水平漠漠芳節或蹉跎遊心稍牢落

春華信為美夏景亦未惡
颭浪嫩青荷重欄晚紅藥
吳宮好風月越郡多樓閣
兩地誠可憐其柰久離索

吳中好風景二首

吳中好風景八月如三月
水荇葉仍香木蓮花未歇
海天微雨散江郭纖埃滅
暑退衣暇乾潮生船舫活
兩衙漸多暇亭午初無熱
騎吏語使君正是遊時節

二

吳中好風景風景無朝暮
曉色萬家烟秋聲八月樹
舟移管絃動橋擁旌旗駐
改號齊雲樓重開武丘路
况當豐歲熟好是歡遊處
州民勸使君且莫執官去

白太守行

劉禹錫

聞有白太守拋官歸舊谿
蘇州十萬戶盡作櫻兒啼

太守駐行舟闔門草萋萋
揮袂謝啼者依然兩眉低
朱戶非不崇我心如重徕
華池非不清意在寥廓栖
夸者竊所怪賢者默思齊
我為太守行題在隱起珪

荅

吏滿六百石昔賢輒去之
秩登二千石今我方罷歸
我秩訝已多我歸慙已遲
猶勝塵土下終老無休期
卧乞百日告起吟五篇詩
謂將罷官自咏五首朝與府吏別暮
與州民辭去年到郡時
麥穗黃離離今年去郡日
稻花白霏霏為郡已周歲
半歲罹旱飢襦袴無一片
茸棠無一枝何乃老與幼
泣別盡沾衣下慙蘇人淚
上愧劉君辭

別蘇州

浩浩姑蘇民鬱鬱長洲城來慙荷寵命去愧無能名
青紫行將吏班白列黎甿一時臨水拜十里隨舟行
餞筵猶未收征棹不可停稍隔烟樹色尚聞絲竹聲
悵望武丘路沉吟澣水亭還鄉信有與去郡能無情

卯時酒

佛法讚醍醐仙方誇沆瀣未如卯時酒神速功力倍
一盃置掌上三嚙入腹內煦若春貫腸暄如日炙背
豈獨肢體暢仍加志氣大當時遺形骸竟日忘冠帶
似遊華胥國疑反混元代一性既完全萬機皆破碎
半醒思往來往來吁可怪寵辱憂喜間惶惶二十載
前年辭紫闥今歲拋皂蓋去矣魚返泉超然蟬離蛻
是非莫分別行止無疑礙浩氣貯胸中青雲委身外
捫心私自語自語誰能會五十年來心未如今日秦
況茲盃中物行坐長相對

自問行何遲

前月發京口今辰次淮涯二旬四百里自問行何遲
還鄉無他計罷郡有餘資進不慕富貴退未憂寒飢
以此易過日騰騰何所為逢山輒倚棹遇寺多題詩
酒醒夜深後睡足日高時眼底一無事心中百不知
想到京國日懶放亦如斯何必冒風水促促赴程歸

除日答夢得同發楚州

共作千里伴俱爲一郡迴歲陰中路盡鄉思先春來
山雪晚猶在淮冰晴欲開歸歎吟可作休戀主人杯

問楊瓊

古人唱歌兼唱情今人唱歌唯唱聲欲說向君君不
會試將此語問楊瓊

有感三首

鬢髮已斑白衣綬方朱紫窮賤當壯年富榮臨暮齒
車輿紅塵合第宅青烟起彼來此須去品物之常理
第宅非吾廬逆旅暫留止子孫非我有委蛻而已矣
有如蠶造繭又似花生子子結花暗凋繭成蠶老死
悲哉可奈何舉世皆如此

二

莫養瘦馬駒莫教小妓女後事在目前不信君看取
馬肥快行走妓長能歌舞三年五歲間已聞換一主
借問新舊主誰樂誰辛苦請羣大帶上把筆書此語

三

往事勿追思追思多悲愴來事勿相迎相迎已惆悵
不如兀然坐不如塌然臥食來即問口睡來即合眼
二事寂關身安寢加餐飯忘懷即行止委命隨修短
更若有興來狂歌酒一盞

宿棗陽

生長在棗陽少小辭鄉曲迢迢四十載復到棗陽宿
去時十一二今年五十六追思兒戲時宛然如在目
舊居失處所故里無宗族豈唯變市朝兼亦遷陵谷
獨有溱洧水無情依舊綠

經溱洧

落日駐吟騎沉吟懷古情鄭風變已盡溱洧至今清

不見士與女亦無芍藥名

就花枝

就花枝移酒海今朝不醉明朝悔且筭歡娛逐日來
任他容鬢隨年改醉翻衫袖拋小令笑擲骰盤呼大
采自量氣力與心情三五年間猶得在

喜雨

圃旱憂葵董農旱憂未救人各有所私我旱憂松竹
松乾竹焦死眷眷在心目灑葉旣其根汲水勞僮僕
油雲忽東起涼雨妻相續似回洗垢塵如頭得膏沐
千柯習習潤萬葉欣欣綠千日澆灌功不如一霖霖
方知宰生靈何異活草木所以聖與賢同心調玉燭

題道宗上人十韻

并序

普濟寺律大德宗上人法堂中有故相國鄭司徒歸
尚書陸刑部元少尹及今吏部鄭相中書韋相錢左
丞詩覽其題皆與上人唱酬閱其人皆朝賢省其文
皆義語予始知上人之文爲義作爲法作爲方便智
作爲解脫性作不爲詩而作也知上人者云爾恐不
知上人者謂爲護國法振靈一皎然之徒與故予題
二十句以解之

如來說偈讚菩薩著論議是故宗律師以詩爲佛事
一音無差別四句有詮次欲使第一流皆知不二義
精潔霑戒體閒淡藏禪味從容恣語言縹緲離文字
旁延邦國彥上達王公貴先以詩句牽後令入佛智
人多愛師句我獨知師意不似休上人空多碧雲思

寄皇甫賓客

名利既兩忘形體方自遂臥掩羅雀門無人驚我睡
睡足抖擻衣閒步中庭地食飽摩挲腹心頭無一事
除却玄晏翁何人知此味

寄庾侍郎

一雙華亭鶴數片太湖石巉巉蒼玉峯矯矯青雲翮
是時歲云暮淡薄烟景夕庭霜封石稜池雪印鶴迹
幽致竟誰別閒靜聊自適懷哉庾順之好是今宵客

寄崔少監

微微西風生稍稍東方明入秋神骨爽琴曉絲桐清
彈爲古宮調玉水寒冷冷自覺絃指下不是尋常聲
須臾羣動息掩琴坐空庭直至日出後猶得心和平

惜哉意未已不使崔君聽

醉題沈子明壁

不愛君池東十叢菊不愛君池南萬竿竹愛君簾下
唱歌人色似芙蓉聲似玉我有陽關君未聞若聞亦
應愁殺君

勸酒

勸君一杯君莫辭勸君兩杯君莫疑勸君三杯君始
知面上今日老昨日心中醉時勝醒時天地迢迢自
長久白兔赤烏相趁走身後堆金拄北斗不如生前
一樽酒君不見春明門外天欲明喧喧歌哭半死生
遊人駐馬出不得白舉紫車爭路行歸去來頭已白
典錢將用買酒喫

落花

留春春不住春歸人寂寞厭風風不定風起花蕭索
既興風前歎重命花下酌勸君嘗綠醅教人拾紅萼
桃飄火焰焰梨墮雪漠漠獨有病眼花春風吹不落

對鏡吟

白頭老人照鏡時掩鏡沉沉吟舊詩二十年前一莖

白如今變作滿頭絲余二十年前常有詩云白髮生一莖朝來明鏡裡勿言一莖少

滿頭從此始吟罷迴頭索杯酒醉來屈指數親知老

於我者多窮賤設使身存寒且飢少於我者半為土

墓樹已抽三五枝我今幸得見頭白祿俸不薄官不

卑眼前有酒心無苦只合歡娛不合悲

耳順吟寄敦詩夢得

三十四十五慾牽七十八十百病纏五十六七十卻不
惡恬淡清淨心安然已過愛貪聲利後猶在病羸昏
毫前未無筋力尋山水尚有心情聽管絃間開新酒
嘗數盞醉憶舊詩吟一篇敦詩夢得且相勸不用嫌

他耳順年

別羶帳火爐

憶昨臘月天北風三尺雪年老不禁寒夜長安不徹
賴有青羶帳風前自張設復此紅火爐雪中相暖熟
如魚入淵水似兔藏深穴婉軟藝鱗蘇温煖凍肌活
方安陰慘夕遽變陽和節無奈時候遷豈是恩情絕
毳簾逐日卷香燎隨灰滅離恨屬三春佳期在十月
但令此身健不作多時別

六年春贈分司東都諸公

時為河南

我為同州牧內愧無才術忝擢恩已多遭逢幸非一
偶當穀賤歲適直民安日郡縣獄空空鄉閭盜奔逸
其間最幸者朝夕多分秩行接管警群坐成芝蘭室
時聯拜表騎間動題詩筆夜雪秉燭遊春風携榼出
花教鶯點檢柳付風排比法酒淡清漿含桃媚紅實
洛童調去聲金管盧女鏗瑤瑟登慘歌思深腰凝舞拍
密每因同醉樂自覺忘衰疾始悟肘後方不如盃中
物生涯隨日過世事何時 老子苦華慵希君數牽率

九日代羅樊二妓招舒著作 齊梁格

羅敷歛雙袂樊姬獻一盃不見舒員外秋菊為誰開

憶舊遊 寄劉蘇州

憶舊遊舊遊安在哉舊遊之人半白首舊遊之地多
蒼苔江南舊遊几幾處就中最憶吳江隈長洲苑綠
柳萬樹齊雲樓春酒一杯閭門曉嚴旗鼓出臯橋夕
開舫舫迴脩蛾慢臉燈下醉急管繁絃頭上催六七
年前狂爛熳三千里外思徘徊李娟張態一春夢周
五殷三歸夜臺虎丘月色為誰好娃宮花枝應自開
賴得劉郎解吟詠江山氣色合歸來 娟態蘇州妓名周殷蘇州從事
峇崔賓客晦叔十二月四日見寄 來篇云共相呼喚醉歸來
今歲日餘二十六來歲年登六十二尚不能憂眼下
身因何更筭人間事居士忘筌默默坐先生枕麴昏
昏睡早晚相從歸醉鄉醉鄉去此無多地

勸我酒

勸我酒我不辭請君歌歌莫遲歌聲長辭亦切此辭
聽者堪愁絕洛陽兒女面似花河南大尹頭如雲

贈韋處士六年夏大熱旱

驕陽連毒暑動植皆枯槁旱日乾密雲炎烟焦茂草
少壯猶困苦况予病且老脫無白栴檀何以除熱惱
華嚴經云以白栴檀塗身能除一切熱惱而得清涼也汗巾束頭髮羶食熏襟
抱始覺韋山人休糧散髮好

白氏文集卷第二十一

白氏文集卷第二十二

格詩雜體凡六
十首

和微之詩二十三首并序

微之又以近作二十三首寄來命僕繼和其間疲絮
四百字車斜二十篇者流皆韻劇辭殫瓌竒怪譎又
題云奉煩只此一度乞不見辭若欲定霸取威置僕
於窮地耳大凡依次用韻韻同而意殊約體爲文文
成而理勝此足下素所長者僕何有焉今足下果用
所長過蒙見窘然敵則氣作急則計生四十二章麾
掃並畢不知大敵以爲如何夫斲石破山先觀鏡跡
發矢中的兼聽絃聲以足下來章惟求相困故老僕
報語不覺大誇况曩者唱酬近來因繼已十六卷凡

千餘首矣其為敵也當今不見其為多也從古未聞
所謂天下英雄唯使君與操耳戲及此者亦欲三千
里外一破愁顏勿示他人以取笑誚樂天白

和晨霞

此後在上都作

君歌仙氏真我歌慈氏真慈氏發真念念此間浮人
左命大迦葉右召桓提因千萬化菩薩百億諸鬼神
上曰非想頂下及風水輪胎卵温化類蠢蠢難具陳
弘願在救拔大悲妄辛勤無論善不善豈間冤與親
扶開生盲眼擺去煩惱塵燭以智日洒之甘露津
千界一時度萬法無與隣借問晨霞子何如朝王宸

和送劉道士遊天台

聞君夢遊仙輕舉超世霧握持尊皇節統衛吏兵軍

靈旂星月象天衣龍鳳紋佩服交帶

諷吟蕊珠文

闥官縹緲間欽樂依稀聞齋心謁西母瞑拜朝東君
烟霏子晉裾霞爛麻姑裙倏忽別真侶悵望隨歸雲
人生同大夢夢與覺誰分况此夢中夢悠哉何足云
假如金闕頂設使銀河濱既未出三界猶應在五蘊
飲嚙日月精茹嚼沆瀣芬尚是色香味六塵之所熏
仙中有天仙首出夢幻羣慈光一照燭奧法相網緼
不知萬齡暮不見三光曛一性自了了萬緣徒紛紛
苦海不能漂劫火不能焚此是竺乾教先生垂典墳

和櫛沐寄道友

櫛沐事朝謁中門初動關盛服去尚早假寐須臾間
鐘聲發東寺夜色藏南山停驂待五漏人馬同時閒

高星粲金粟落月沉玉環出門向關路坦坦無阻艱
始出里北開稍轉市西闌晨燭照朝服紫爛復朱殷
由來朝廷士一入多不還因循擲白日積漸凋朱顏
青雲已難致碧落安能攀但且知止足尚可稍憂患

和祝蒼華

蒼華髮
神名

日居復月諸環迴照下土使我玄雲髮化爲素絲縷
稟質本羸劣養生仍莽鹵痛飲困連霄悲吟飢過午
遂令頭上髮種種無尺五根稀比黍苗梢細同釵股
豈是乏膏沐非關飾風雨最爲悲傷多心焦衰落苦
餘者能有幾落者不可數禿似鵲填河墮如烏解羽
蒼華何用祝苦辭亦休吐正如剃頭僧豈要巾冠主
和我年三首

我年五十七榮名得幾許甲乙三道科蘇杭兩州主
才能本淺薄心力虛勞苦可能隨衆人終老於塵土

二

我年五十七歸去誠已遲歷官十五政數若珠纍纍
野萍始宿薦場苗初繫維因讀管蕭書竊慕大有爲
及遭榮遇來乃覺才力羸黃紙詔頻草朱輪車載脂
妻孥及僕使皆免寒與飢省躬私自愧知我者微之
永懷山陰守未遂嵩陽期如何坐留滯頭白江之湄

三

我年五十七榮名得非少報國竟何如謀身猶未了
昔嘗速官謗恩大而懲小一黜鶴辭軒七年魚在沼
將枯鱗再躍經鍛翮重矯白日上昭昭青雲高渺渺

平生頗同病老大宜相曉紫綬足可榮白頭不為天
夙懷慕箕顛晚節期松篠何當闕下來同拜陳情表

和三月三十日四十韻

送春君何在君在山陰署憶我蘇杭時春遊亦多處
為君歌往事豈敢辭勞慮莫怪言語狂須知酬答遽
江南臘月半冰凍疑如瘧寒景尚蒼茫和風已吹噓
女墻城似竈鴈翅橋如鋸魚尾上齋淪草芽生沮洳
律遲太簇管日緩羲和馭布澤木龍催迎春土牛助
雨師習習灑雲將飄飄翥四野萬里晴千山一時曙
杭土麗且康蘇民富而庶善惡有懲勸剛柔無吐茹
兩衙少辭牒四境稀書疏俗以勞俸安政因閒暇著
仙亭日登眺虎丘時游預望山亭在杭蘇尋幽駐旌軒

選勝迴賓御舟移溪鳥避樂作林猿覩池古莫耶沉

石竒羅刹踞

劍池在蘇州羅刹石在杭州

水苗泥易耨畚粟灰難

鋤紫葳抽出畦白蓮埋在淤菱花紅帶黯溫葉黃含

菸楚辭云葉菸色而就黃

鏡動波颭菱雪迴風旋絮手經攀桂

馥齒為嘗梅楚坐併舩脚欹行多馬啼跼聖賢清濁

醉水綠鮮肥飮魚鱸芥醬調水葵鹽豉絮勅慮反雖微

五袴詠幸免兆人詛但令樂不荒何必遊無倨吳苑

僕尋罷越城公尚據舊遊幾客存新宴誰人與莫空

文舉酒強下何曾筋江上易優游城中多毀譽分應

當自盡事勿求人怨我既無子孫君仍畢婚娶父為

雲雨別終擬江湖去范蠡有扁舟陶潛有籃輦兩心

苦相憶兩口遙相語最恨七年春春來各一處

和寄樂天

賢愚類相交人情之大率然自古今來幾人號膠漆
近聞屈指數元某與白乙旁愛及弟兄中權避家室
松筠與金石未足喻堅密在車如輪轅在身如肘腋
又如風雲會天使相召匹不似勢利交有名而無實
頃我在杭歲值君之越日望愁來儀遲宴惜流景疾
坐耀黃金帶酌醪頰玉質酣歌口不停狂舞衣相拂
平生賞心事施展十未一會笑始啞啞離嗟乃唧唧
餞筵纔收拾征棹遽排比後恨苦縣縣前歡何卒卒
言人色慘淡行子心紆鬱風袂去時揮雲帆望中失
宿醒和別思日眩心忽忽病魂黯然銷老淚淒其出
別君只如昨芳歲換六七俱是官家身後期難自必

籍田賦云難望歲而自必

和寄問劉白

時夢得與樂天方舟西上

正與劉夢得醉笑大開口適值此詩來歡喜君知否
遂令高卷幕兼遣重添酒起望會稽雲東南一回首
愛君金玉句舉世誰人有功用隨日新資財本天授
吟哦不能散自午將及酉遂留夢得眠匡床宿東牖

和新樓北園偶集從孫公度周巡官韓秀才

盧秀才范處士小飲鄭侍御判官周劉二

從事皆先歸

聞君新樓宴下對北園花主人既賢豪賓客皆才華
初筵日未高中飲景已斜天地為幕席富貴如泥沙
嵇劉陶阮徒不足置齒牙臥甕鄙卑卓落帽嗤孟嘉

芳草供枕藉亂鶯助誼譁醉得道路鄉狂海無津涯
一歲春又盡百年期不賒同醉君勿辭獨醒古所嗟
銷愁若沃雪破悶如割瓜稱觴起爲壽此樂無以加
歌聲疑貫珠舞袖飄亂麻相公謂四座今日非自誇
有奴善吹笙有婢彈琵琶十指纖若筍雙鬟驚如鷗
履舄起交雜盃盤散紛拏歸去勿擁遏倒載逃難遮
明日宴東武後日遊若耶豈獨相公樂謳歌千萬家

和除夜作

君賦此詩夜窮陰歲之餘我和此詩日微和春之初
老知顏狀改病覺肢體虛頭上毛髮短口中牙齒踈
一落老病界難逃生死墟况此促促世與君多索居
君在浙江東榮駕方伯輿我在魏闕下謬乘大夫車
妻孥常各飽奴婢亦盈廬唯是利人事比君全不如
我統十郎官君領百吏胥我掌四曹局君管十鄉閭
君爲父母君大惠在資儲我爲刀筆吏小惡乃誅鋤
君提七郡籍我按三尺書俱已佩金印嘗同趨玉除
外寵信非薄中懷何不攄恩光未報荅日月空居諸
磊落嘗許君跼促應笑予所以自知分欲先歌歸歎

和知非

因君知非間詮較天下事第一君莫禪第二無如醉
禪能泯人我醉可忘榮悴與君次第言爲我少留意
儒教重禮法道家養神氣重禮足滋彰養神多避忌
不如學神定中有甚深味曠廓了如空澄疑勝於睡
屏除默默念銷盡悠悠思春無傷春心秋無感秋淚

坐成真諦樂如受空王賜既得脫塵勞兼應離慙愧
除禪其次醉此說非無謂一酌機即忘三盃性咸遂
逐臣去室婦降虜敗軍帥思苦膏火煎憂深倚鑊秘
須憑百杯沃莫惜千金費便似罇中魚脫飛生兩翅
勸君雖老大逢酒莫迴避不然即學禪兩途同一致

和望曉

休吟稽山曉聽詠秦城且鳴鷄初有聲宿鳥猶未散
丁丁漏向盡鼕鼕鼓過半南山沉沉東方白漫漫
街心若流水城角如斷岸星河稍隅落官闕方輪煥
朝車雷四合騎火星一貫赫奕冠蓋盛熒煌朱紫爛
沙堤蝦蟇池子城東北低下處舊號蝦蟇池市路遶龍斷白日忽
照耀紅塵紛散亂貴教過客避榮任行人看祥烟滿

虛空春色無邊畔鵲行候晷刻龍尾登霄漢臺殿暖
宜攀風光晴可翫草鋪地茵褥雲卷天幃幔鷲雜佩
鏘鏘花遶衣粲粲何言終日樂獨起臨風歎歎我同
心人一別春七換相望山隔礙欲去官羈絆何日到
江東超然似張翰

和李勢女

減一分大短增一分太長不朱面若花不粉肌如霜
色爲天下艷心乃女中郎自言重不幸家破身未亡
人各有一死此死職所當忍將先人體與主爲疣瘡
妾死主意快從此兩無妨願信赤心語速即白刃光
南郡忽感激却立捨鋒鏑撫背稱阿姊歸我如歸鄉
竟以恩信待豈止猜妬忘由來機上肉不足揮干將

南郡死已久骨枯墓蒼蒼願於墓上頭立石鐫此章
勸誠天下婦不令陰勝陽

和酬鄭侍御東陽春悶放懷追越遊見寄

君得嘉魚置賓席樂如南有嘉魚時勁氣森爽竹竿
竦妍文煥爛芙蓉披載筆在幕名已重補袞於朝官
尚卑一緘疏入掩谷永三都賦成排左思自言拜辭
主人後離心蕩颺風前旗東南門館別經歲春眼悵
望秋心悲已上叙嘉魚昨日嘉魚來訪我方駕同出何所
之樂遊原頭春尚早百舌新語新禪禪日趁花忙向
南拚風摧柳急從東吹流年愒恍未饒我美景鮮妍
來爲誰紅塵二條界阡陌碧草千里鋪郊畿餘霞斷
時綺幅裂斜雲展處羅文紕暮鐘遠近聲互動暝鳥

高下飛追隨酒酣將歸未能去悵然迴望天四垂生
何足養嵇著論途何足泣楊漣而胡不花下伴春醉
滿酌綠酒聽黃鸝嘉魚點頭時一歎聽我此言不知
疲語終興盡各分散東西軒騎分逶迤此詩勿遣閒
人見見恐與他爲笑資白首舊寮知我者憑君一詠

向周師

周判官師範蘇杭舊判官去範字叶韻

和自勸二首

稀稀踈踈遶籬竹窄窄狹狹向陽屋屋中有一曝背
翁委置形骸如土木日暮半爐麩炭火夜深一盞紗
籠燭不知有益及民無二十年來食官祿就暖移盤
簷下食防寒擁被帷中宿秋官月俸八九萬豈徒遣
爾身温足勤操丹筆念黃沙莫使飢寒囚滯獄

急景周年急於水念此攬衣中夜起門無宿客共誰
言煖酒挑燈對妻子自飲數杯妻一盞餘酌分張與
兒女微酣靜坐未能眠風霰蕭蕭打窓紙自問有何
才與術入為丞郎出刺史爭如壽命短復長豈得營
營心不止請看韋孔與錢崔半月之間四人死

韋中書孔

京兆錢尚書崔華州十五日間相次而逝

和雨中花

真宰倒持生殺柄閒物命長人短命松枝上鶴著下
龜千年不死仍無病人生不得似龜鶴少去老來同
旦暝何異花開旦暝間未落仍遭風雨橫草得經年
萊連月唯花不與多時節一年三百六十日花能幾

日供攀折桃李無言難自訴黃鸝解語憑君說鸞雖
為說不分明葉底枝頭謾饒舌

和晨興因報問龜兒

冬且寒慘澹雲日無晶輝當此歲暮感見君晨興詩
君詩亦多苦苦在兄遠離我苦不在遠纏綿肝與脾
西院病孀婦後牀孤姪兒黃昏一慟後夜半一起時
病眠兩行淚悲鬢萬莖絲咽絕五臟脉瘦消百骸脂
雙目失一目四肢斷兩肢不如溘然逝安用半活為
誰謂茶蘖苦茶蘖甘如飴誰謂湯火熱湯火冷如澌
前時君寄詩憂念問阿龜喉燥聲氣室經年無報辭
及覩晨興句未吟先涕垂因茲漣洳際一吐心中悲
茫茫四海問此苦唯君知我去四千里使我告訴誰

仰頭向青天但見鴈南飛鴈寄一語爲我達微之
弦絕有續膠樹斬可接枝唯我中腸斷應無連得期
和朝回王鍊師遊南山下
藹藹春景餘
藜藜夏雲初
躡蹠退朝騎
飄飄隨風過
晨從四丞相入拜
白玉除暮與一道士出尋青溪居
吏隱本齊致朝野孰云殊
道在有中適機忘無外虞
但愧烟霄上鸞鳳爲吾徒
又慙雲林間鷗鶴不我踈
坐傾數杯酒臥枕一卷書
興酣頭兀兀睡覺心于于
以此送日月問師爲何如

嘗新酒

空腹嘗新酒偶成卯時醉
醉來擁褐裘直至齋時睡
靜酣不語笑真寢無夢寐
殆欲忘形骸詎知屬天地

醒餘和未散起坐澹無事
舉臂一欠伸引琴彈秋思

和順之琴者

陰陰花院月耿耿蘭房燭
中有弄琴人聲貌俱如玉
清冷石泉引雅澹風松曲
遂使君子心不愛凡絲竹

感舊寫真

李放寫我真寫來二十載
莫問真何如盡亦銷光彩
朱顏與玄髮日夜改復改
無嗟貌遽非且喜身猶在

授太子賓客歸洛

自此後東都作

南省去拂衣東都來掩扉
病將老齊至心與身同歸
白首外緣少紅塵前事非
懷哉紫芝叟千載心相依

秋池二首

身閒無所爲心閒無所思
况當故園夜復此新秋池

岸閣鳥棲後橋明月出時菱風香散漫桂露光參差
靜境多獨得幽懷竟誰知悠然心中語自問來何遲

朝衣薄且健晚簟清仍滑社近燕影稀雨餘蟬聲歌
間中得詩境此境幽難說露荷珠自傾風竹玉相戛
誰能一同宿共翫新秋月暑退涼草歸池邊好時節

中隱

大隱住朝市小隱入丘樊丘樊太冷落朝市大囂諠
不如作中隱隱在留司官似出復似處非忙亦非閒
不勞心與力又免飢與寒終歲無公事隨月有俸錢
君若好登臨城南有秋山君若愛遊蕩城東有春園
君若欲一醉時出赴賓筵洛中多君子可以恣歡言

君若欲高卧但自深掩關亦無車馬客造次到門前
人生處一世其道難兩全賤即苦凍餒貴則多憂患
唯此中隱士致身吉且安窮通與豐約正在四者間

問秋光

殷卿領北鎮崔尹開南幕外事信為榮中懷未必樂
何如不才者兀兀無所作不引窓下琴即舉池上酌
淡交唯對水老伴無如鶴自適頗從容旁觀誠淺落
身心轉恬泰烟景彌淡泊迴首語秋光東來應不錯

引泉

一為止足限二為衰疾牽邴罷不因事陶歸非待年
歸來嵩洛下閉戶何條然靜掃林下地閒疏池畔泉
伊流狹似帶洛石大如拳誰教明月下為我聲濺濺

竟夕舟中坐有時橋上眠何用施屏障水竹繞牀前

知足吟

和崔十八
未貧作

不種一隴田倉中有餘粟不採一株桑箱中有餘服
官間雖憂責身泰無羈束中人百戶稅賓客一年祿
樽中不乏酒籬下仍多菊是物皆有餘非心無所欲
吟君未貧作因歌知足曲自問此時心不足何時足

酬集賢劉郎中對月見寄兼懷元浙東

月在洛陽天天高淨如水下有白頭人擘衣中夜起
思遠鏡亭上光深書殿裡眇然三處心相去各千里

太湖石

遠望老差峩近觀怪嶽崮纔高八九尺勢若千萬尋
嵌空華陽洞重疊屏山岑邈矣仙掌迥呀然劒門深

形質冠今古氣色通晴陰未秋已瑟瑟欲雨先沉沉
天姿信爲異時用非所任磨刀不如礪擣帛不如砧
何乃主人意重之如萬金豈伊造物者獨能知我心

偶作二首

擾擾貪生人幾何不天闕遑遑愛名人幾何能貴達
伊余信多幸拖紫垂白髮身爲三品官年已五十八
筋骸雖早衰尚未苦羸憒資產雖不豐亦不甚貧竭
登山力猶在遇酒興時發無事日月長不羈天地濶
安身有處所適意無時節解帶松下風抱琴池上月
人間所重者相印將軍鉞謀慮繫安危威權主生殺
焦心一身苦炙手旁人熱未必方寸間得如吾快活

日出起盥櫛振衣入道場寂然無他念但對一爐香
日高始就食食亦非膏粱精粗隨所有亦足飽充腸
日午脫巾簪燕息窓下床清風颯然至卧可致羲皇
日西引杖屨散步遊林塘或飲茶一盞或吟詩一章
日入多不食有時唯命觴何以送閒夜一曲秋霓裳
一日分五時作息率有常自喜老後健不嫌閒中忙
是非一以貫身世交相忘若問此何許此是無何鄉

葺池上舊亭

池月夜淒涼池風曉蕭颯欲入池上冬先葺池中閣
向暖窓戶開迎寒簾幕合苔封舊瓦木水照新朱蠟
軟火深土爐香醪小瓷盃中有獨宿翁一燈對一榻

崔十八新池

愛君新小池池色無人知見底月明夜無波風定時
忽看不似水一泊稀琉璃

翫止水

動者樂流水靜者樂止水利物不如流鑒形不如止
淒清早霜降淅瀝微風起中葉紅面開四隅綠萍委
廣狹八九丈灣環有涯涘淺深三四尺洞徹無表裡
淨分鶴翹足澄見魚掉尾迎眸洗眼塵隔育蕩心滓
定將禪不別明與誠相似清能律貪夫淡可交君子
豈唯空押翫亦取相倫擬欲識靜者心心源只如此

聞崔十八宿于新昌弊宅時予亦宿崔家依

仁新亭一宵偶同兩興暗合因而成詠聊

以寫懷

陋巷掩弊廬高居敞華屋新昌大林松依仁萬莖竹
松前月臺白竹下風池綠君向我齋眠我在君亭宿
平生有微尚彼此多幽獨何必求主人兩心聊自足

日長

日長晝加餐夜短朝餘睡春來寢食間雖老猶有味
林塘得芳景園曲生幽致愛水多棹舟惜花不掃地
幸無眼下病且向樽前醉身外何足言人間本無事

三月三十日作

今朝三月盡寂寞春事畢黃鳥漸無聲朱櫻新結實
臨風獨長歎此歎意非一半百過九年艷陽殘一日
隨年減歡笑逐日添衰疾且遣花下歌送此盃中物
慵不能

架上非無書眼慵不能看匣中亦有琴手慵不能彈
腰慵不能帶頭慵不能冠午後恣情寢午時隨事餐
一餐終日飽一寢至夜安飢寒亦間事况乃不飢寒

晨興

宿鳥動前林晨光上東屋銅爐添早香紗籠滅殘燭
頭醒風稍愈眼飽睡初足起坐兀無思叩齒三十六
何以解宿齋一杯雲母粥

朝課

平甃白石渠靜掃青苔院池上好風來新荷大如扇
小亭中何有素琴對黃卷藥珠諷數篇秋思彈一遍
從容朝課畢方與客相見

天竺寺七葉堂避暑

鬱鬱復鬱鬱伏熱何時畢行入七葉堂煩暑隨步失
簷雨稍霏微窓風正蕭瑟清宵一覺睡可以銷百疾
香山寺石樓潭夜浴

炎光晝方熾暑氣宵彌毒搖扇風甚微褰裳霏霖
起向月中行來就潭中浴平石爲浴牀窪石爲浴斛
綃巾薄露頂草屨輕乘足清涼詠而歸歸上石樓宿
嗟髮落

朝亦嗟髮落暮亦嗟髮落落盡誠可嗟盡來亦不惡
旣不勞洗沐又不勞梳掠最宜濕暑天頭輕無髻縛
脫置垢巾幘解去塵纓絡銀瓶貯寒泉當頂傾一勺
有如醍醐灌坐受清涼落因悟自在僧亦資於剗削
安穩眠

家雖日漸貧猶未苦飢凍身雖日漸老幸無急病痛
眼逢鬧處合心向閒時用旣得安穩眠亦無顛倒夢
池上夜境

晴空星月落池塘澄鮮淨綠表裡光露簾清瑩迎夜
滑風襟蕭洒先秋涼無人驚處野禽下新睡覺時幽
草香但問塵埃能去否濯纓何必向滄浪

書紳

仕有職役勞農有畝畝勤優哉分司叟心力無苦辛
歲晚頭又白自問何欣欣新酒始開瓮舊穀猶滿困
吾嘗靜自思徃徃夜達晨何以送吾老何以安吾貧
歲計莫如穀飽則不干人日計莫如醉醉則兼忘身
誠知有道理未敢勸交親恐爲人所哂聊自書諸紳

秋遊平泉贈韋處士閒禪師

秋景引閒步山遊不知疲杖藜捨輿馬十里與僧期
昔嘗憂六十四體不支持今來已及此猶未苦衰羸
予往年有詩云三十氣大壯四十多是
非六十年太老四體不支持今故云心興遇境發
身力因行知尋雲到起處愛泉聽滴時南村韋處士
西寺閒禪師山頭與澗底聞律且相隨

遊坊口懸泉偶題石上

時為河南尹

濟源山水好老尹知之久常日聽人言今秋入吾手
孔山刀劍立沁水龍蛇走危磴上懸泉澄灣轉坊口
虛明見深底淨綠無纖垢仙棹浪悠揚塵纓風抖擻
巖寒松栢短石古莓苔厚錦座纓高低翠屏張左右
雖無安石妓不乏文舉酒談笑逐身來管絃隨事有

時逢杖錫客或值垂綸叟相與澹忘歸自辰將及酉
公門欲返駕溪路猶迴首早晚重來遊心期罷官後

對火翫雪

平生所心愛愛火兼憐雪火是臘天春雪為陰夜月
鵝毛紛正墮獸炭敲初折盈尺白鹽寒滿爐紅玉熱
稍宜杯酌動漸引笙歌發但識歡來由不知醉時節
銀盤堆柳絮羅袖搏瓊屑共愁明日銷便作經年別
六年寒食洛下宴遊贈馮李二少尹

豐年寒食節美景洛陽城三尹皆強健七日盡清明
東郊踏青草南園攀紫荆風折海榴艷露墜木蘭英
假開春未老宴合日屢傾珠翠混花影管絃藏水聲
佳會不易得良辰亦難并聽吟歌暫輟看舞杯徐行

米價賤如土酒味濃於餠此時不盡醉但恐負平生
殷勤二曹長各捧一銀觥

苦熱中寄舒員外

何堪日衰病復此時炎燠厭對俗杯盤倦聽九絲竹
藤牀鋪晚雪角枕截寒玉安得清瘦人新秋夜同宿
非君固不可何夕枉高躅

閒夕

一聲早蟬發數點新螢度蘭缸耿無烟筠簟清有露
未歸後房寢且下前軒步斜日入低廊涼風滿高樹
放懷常自適遇境多成趣何法使之然心中無細故

寄情

灼灼早春梅東南枝最早持來翫未足花向手中老

芳香銷掌握悵望生懷抱豈無後開花念此先開好

舒員外遊香山寺數日不歸兼辱尺書大誇

勝事時正值坐衙慮囚之際走筆題長句

以贈之

香山石樓倚天開翠屏碧立波環迴黃菊繁時好客

到碧雲合處佳人來

謂遺英舊二妓與舒君同遊

酡顏一笑天桃

綻清唸數聲寒主哀軒騎逶遲棹容與留連三日不
能迴白頭老尹府中坐早衙纔退暮衙催庭前堦上
何所有纍囚成貫案成堆豈無池塘長秋草亦有絲
竹生塵埃今日清光昨夜月竟無人來勸一杯

早夕遊王屋白靈都抵陽臺上方望天壇偶

吟成章寄溫公周尊師中書李相公

霜降山水清王屋十月時石泉碧漾漾巖樹紅離離
朝爲靈都遊暮有陽臺期飄然世塵外鸞鶴如可追
忽念公程盡復慙身力衰天壇在天半欲上心遲遲
嘗聞此遊者隱客與損之各抱貴仙骨俱非泥垢姿
二人相顧言彼此稱男兒若不爲松喬即湏作臯夔
今果如其語光彩雙文歲蕤一人佩金印一人翳玉芝
我來高其事詠歎偶成詩爲君題石上欲使故山知
吳宮辭

淡紅花帳淺檀蛾

臉初開似剪波坐對珠籠閒理

曲琵琶鸚鵡語相和

白氏文集卷第二十二

白氏文集卷第二十三

律詩

九一首

元微之除浙東觀察使喜得杭越隣州先贈

長句

十七首並與微之和答

稽山鏡水歡遊地犀帶金章榮貴身官職比君雖校
小封疆與我且爲隣郡樓對翫千峰月江界平分兩
岼春杭越風光詩酒主相看更合是何人

席上荅微之

我住浙江西君去浙江東勿言一水隔便與千里同
富貴無人勸君酒今宵爲我盡杯中

荅微之上船後留別

燭下樽前一分手舟中岼上兩迴頭歸來虛白堂中

夢合眼先應到越州

荅微之泊西陵驛見寄

烟波盡處一點白應是西陵古驛臺知在臺邊望不見暮潮空送渡船迴

荅微之誇越州州宅

賀上人回得報書大誇州宅似仙居厭看馮翊風沙久喜見蘭亭烟景初日出旌旗生氣色月明樓閣在空虛知君暗數江南郡除却餘杭盡不如

微之重誇州居其落句有西州羅刹之謔因

嘲茲石聊以寄懷

君問西州域下事醉中疊紙為君書嵌空石面標羅刹壓捺潮頭敵子胥神鬼曾鞭猶不動波濤雖打欲

何如誰知太守心相似抵滯堅頑兩有餘

張十八負外以新詩二十五首見寄郡樓月

下吟通夕因題卷後封寄微之

秦城南省清秋夜江郡東樓明月時去我三千六百
里得君二十五篇詩陽春曲調高難和淡水交情老
始知坐到天明吟未足重封轉寄與微之

酬微之

微之題云郡務稍簡因得整集舊詩并連綴刪削封章諫草繁委籍笥僅踰百軸偶成自歡兼寄樂天

滿篋填箱唱和詩少年為戲老成悲聲聲麗曲敲寒

玉句句妍辭綴色絲吟觀獨當明月夜傷嗟同是白

頭時由來才命相磨折天遣無兒欲怨誰微之句云天遣兩家

無嗣子欲將文字付誰人故以此荅之

餘思未盡加為六韻重寄微之

海內聲華併在身篋中文字絕無倫美微也遙知獨對

封章草忽憶同為獻納臣走筆往來盈卷軸予與微

奇和詩數百篇近除官遞互掌絲綸予除中書舍人

之除翰林學制從長慶辭高古微之長慶初知制誥

士予撰制詞繼者効詩到元和體變新衆稱元白為千字各有文

姬才稚齒蔡邕無兒有俱無通子繼餘塵陶潛小兒

琴書何必求王粲與女猶勝與外人

荅微之詠懷見寄

閣中同直前春事船裡相逢昨日情分袂二年勞夢

寐並牀三宿話平生紫微北畔辭官闕滄海西對

郡城聚散窮通何足道醉來一曲放歌行

酬微之誇鏡湖

我嗟身老歲方徂君更官高興轉孤軍門郡閣曾聞

否禹穴耶溪得到無酒盞省陪波卷白散盤思共彩

呼盧一泓鏡水誰能羨自有芻中萬頃湖微之詩云

隨宜看不必遙遙笑鏡湖故以此戲言荅之

雪中即事荅微之

連夜江雲黃慘澹平明山雪白模糊銀河沙漲三千

里梅嶺花排一萬株北市風生飄散麩東樓日出照

凝酥誰家高士關門戶何處行人失道途舞鶴庭前

毛稍定擣衣砧上練新鋪戲團稚女呵紅手愁坐衰

翁對白鬚壓瘴一州除疾苦呈豐萬井盡歡娛潤含

玉德懷君子寒助霜威憶大夫莫道烟波一水隔何

妨氣候兩相殊越中地暖多成雨還有瑤臺瓊樹無
醉封詩筒寄微之

一生休戚與窮通處處相隨事事同未死又隣滄海
郡無兒俱作白頭翁展眉只仰三杯後代面唯憑五
字中爲向兩川郵吏道莫辭來去遞詩筒

除夜寄微之

鬢毛不覺白氍毹一事無成百不堪共惜盛時辭闕
下同嗟除夜在江南家山泉石尋常憶世路風波子
細諳老校於君合先退明年半百又加三

蘇州李中丞以元日郡齋感懷詩寄微之及
予輒依來篇七言八韻走筆奉荅兼呈微
之

白首餘杭白太守落魄拋名來已久一辭渭北故園
春再把江南新歲酒杯前笑歌徒勉強鏡裡形容漸
衰朽領郡慙當潦倒年隣州喜得平安友長洲草接
松江岬曲小花連鏡湖口老去還能痛飲無春來曾
作閒遊否憑鸞傳語報李六倩鴈將書與元九莫嗟
一日日催人且貴一年年入手

早春西湖閒遊悵然興懷憶與微之同賞因
思在越官重事殷鏡湖之遊或恐未暇偶
成十八韻寄微之

上馬復呼賓湖邊景氣新管絃三數事騎從十餘人
立換登山屐行攜漉酒巾逢花看當妓過草坐爲茵
西日籠黃柳東風蕩白蘋小橋裝鴈齒輕浪翫魚鱗

畫舫牽徐轉銀舫酌慢巡野情遺世累醉態任天真
彼此年將老平生分最親高天從所願遠地得爲隣
雲樹分三驛烟波限一津翻嗟寸步隔却厭尺書頻
浙右稱雄鎮山陰委重臣貴坐長紫綬榮駕大朱輪
出動刀槍隊歸生道路塵鴈驚弓易散鷗怕鼓難馴
百吏瞻相面千夫捧擁身自然閒與少應負鏡湖春
荅微之見寄時在邵樓對雪
可憐風景浙東西先數餘杭次會稽禹廟未勝天竺
寺錢湖不羨若耶溪擺塵野鶴春毛暖拍水沙鷗濕
翅低更對雪樓君愛否紅欄碧甃點銀泥

祭社宵興燈前偶作

城頭傳鼓角燈下整衣冠夜鏡藏鬚白秋泉漱齒寒

欲將閒送老須著病辭官更待年終後支持歸計看

閒臥

盡日前軒臥神閒境亦空有山當枕上無事到心中
簾卷侵牀日屏遮入座風望春春未到應在海門東

新春江次

浦乾潮未應堤濕凍初銷粉片粧梅朶金絲刷柳條
鴨頭新綠水鴈齒小紅橋莫怪珂聲碎春來五馬驕

春題湖上

湖上春來似畫圖亂峰圍繞水平鋪松排山面千重
翠月點波心一顆珠碧毯線頭抽早稻青羅裙帶展
新蒲未能拋得杭州去一半勾留是此湖

早春憶微之

昏昏老與病相和感物思君歎復歌聲早雞先知夜
短色濃柳最占春多沙頭雨染斑斑草木回風駭瑟
瑟波可道眼前光景惡其如難見故人何

失鶴

失爲庭前雪飛因海上風九霄應得侶三夜不歸籠
聲斷碧雲外影沉明月中郡齋從此後誰伴白頭翁

自感

宴遊寢食漸無味杯酒管絃徒繞身賓客歡娛僮僕
飽始知官職爲他人

得湖州崔十八使君書喜與杭越隣郡因成
長句代賀兼寄微之

三郡何因此結緣貞元科第忝同年故情歡喜開書

後舊事思量在眼前越國封疆吞碧海杭城樓閣入

青烟吳興卑小君應屈爲是蓬萊最後仙貞元初同登科崔君

名最在後當時崔自詠云人間不會雲間事應笑蓬萊最後仙

同諸客攜酒早看櫻桃花

曉報櫻桃發春攜酒客過綠飴粘盞杓紅雪壓枝柯
天色清明少人生事故多停杯替花語不醉擬如何

柳絮

三月盡時頭白日與春老別更依依憑鶯爲向楊花
道絆惹春風莫放歸

早飲湖州酒寄崔使君

一榼扶頭酒泓澄瀉玉壺十分蘸甲酌漱艷滿銀盃
捧出華光動嘗看氣味殊手中稀琥珀舌上冷醍醐

瓶裡有時盡江邊無處沽不知崔太守更有寄來無
病中書事

三載臥山城閒知節物情鶯多過春語蟬不待秋鳴
氣嗽因寒發風痰欲雨生病身無所用唯解卜陰晴
與微之唱和來去常以竹筒貯詩陳協律美
而成篇因以此荅

揀得琅玕截竹筒緘題章句寫心曾隨風每喜飛如
鳥渡水常憂化作龍粉節堅如太守信霜筠冷稱大
夫容煩君讚詠心知愧魚目驪珠同一封

醉戲諸妓

席上爭飛使君酒歌中多唱舍人詩不知明日休官
後逐我東山去是誰

北院

北院人稀到東牕地最偏竹烟行竈上石壁卧房前
性拙身多暇心慵事少緣還如病居士唯置一牀眠

酬周協律

五十錢塘守應爲送老官濫蒙辭客愛猶作近臣看
鑿落愁須飲琵琶悶遣彈白頭雖强醉不似少年歡

題石上人

騰騰兀兀在人間貴賤賢愚盡往還羶膩筵中唯飲
酒歌鐘會處獨思山存神不許三尸住混俗無妨兩
鬢斑除却餘杭白太守何人更解愛君閒

詩解

新篇日日成不是愛聲名舊句時時改無妨悅性情

但令長守郡不覺却歸城祇擬江湖上吟哦過一生

潮

早潮纔落晚潮來一月周流六十回不獨光陰朝復暮杭州老去被潮催

聞歌妓唱嚴郎中詩因以絕句寄之嚴前為

已留舊政布中和又付新詞與艷歌但是人家有遺愛就中蘇小感恩多

柘枝妓

平鋪一合錦筵開運擊三聲畫鼓催紅蠟燭移桃葉起紫羅衫動柘枝來帶坐鈿睍花腰重帽轉金鈴雪面迴看即曲終留不住雲飄雨送向陽臺

急樂世辭

正抽碧線繡紅羅忽聽黃鶯歛翠蛾秋思冬愁春悵望大都不稱意時多

天竺寺送堅上人歸廬山

錫杖登高寺香爐憶舊峰偶來舟不繫忽去鳥無蹤豈要留離偈寧勞動別容與師俱是夢夢裡暫相逢

除官赴闕留贈微之

去年十月半君來過浙東今年五月盡我發向關中兩鄉默默心相別一水盈盈路不通從此津人應省事寂寥無復述詩筒

留題郡齋

吟山歌水嘲風月便是三年官滿時春為醉眠多閉閣秋因晴望暫褰帷更無一事移風俗唯化州民解

詠詩

別州民

耆老遯歸路壺漿滿別筵甘棠無一剗那得淚潸然
稅重多貧戶農饑足旱田唯留一湖水與汝救凶年
今春增築錢塘湖堤貯水以防天旱故云

留題天竺靈隱兩寺

在郡六百日入山十二回宿因月桂落醉為海榴開
天竺嘗有月中桂子落靈隱多海石榴花也黃紙除書到青宮詔命催僧
徒多悵望賓從亦徘徊寺暗烟埋竹林香雨落梅別
橋憐白石辭洞戀青苔石橋在天竺明洞在靈隱漸出松間路猶
飛馬上杯誰教冷泉水送我下山來

西湖留別

征途行色慘風烟祖帳離聲咽管絃翠黛不須雷五
馬皇恩只許任三年綠藤陰下鋪歌席紅藕花中泊
妓船處處回頭盡堪戀就中難別是湖邊

重寄別微之

憑仗江波寄一辭不須惆悵報微之猶勝往歲峽中
別灑灑堆邊招手時

重題別東樓

東樓勝事我偏知氣象多隨昏旦移湖卷衣裳白重
疊山張屏障綠參差海仙樓塔晴方出江女笙簫夜
始吹春雨星攢尋蟹火秋風霞颭弄濤旗餘杭風俗每寒食用後夜涼家家持燭尋蟹動盈萬人每歲八月迎濤弄水者悉舉旗幟焉宴宜雲髻新梳
後曲愛霓裳未拍時太守三年嘲不盡郡齋空作百

篇詩

別周軍事

主人頭白官仍冷去後憐君是底人試謁會稽元相
去不妨相見却殷勤

看常州柘枝贈賈使君

莫惜新衣舞柘枝也從塵汚汗霑塗料君即却歸朝
去不見銀泥衫故時

汴河路有感

三十年前路孤舟重往還繞身新眷屬舉目舊鄉關
事去唯留水人非但見山啼襟與愁髮此日兩成斑

埭橋舊業

別業埭城北拋來二十春改移新逕路變換舊村隣

有稅田疇薄無官弟姪貧田園何用問強半屬他人

茅城驛

汴河無景思秋日又淒淒地薄桑麻瘦村貧屋舍低
早苗多間草濁水半和泥最是蕭條處茅城驛向西

河陰夜泊憶微之

憶君我正泊行舟望我君應上郡樓萬里月明同此
夜黃河東面海西頭

杭州迴舫

自別錢唐山水後不多飲酒懶吟詩欲將此意憑迴
棹與報西湖風月知

途中題山泉

泱泱涌岩穴濺濺出洞門向東應入海從此不歸源

似葉飄辭對如雲斷別根吾身亦如此何日返鄉園
欲到東洛得楊使君書因以此報

向公心切向財踈淮上休官洛下居三郡政能從獨
步十年生計復何如使君灘上久分手別駕渡頭先
得書且喜平安又相見其餘外事盡空虛

洛下寓居

秋館清涼日書因解悶看夜牕幽獨處琴不為人彈
遊宴慵多廢趨朝老漸難禪僧教斷酒道士勸休官
渭曲庄猶在錢塘俸尚殘如能便歸去亦不至飢寒

味道

叩齒晨與秋院靜焚香冥坐晚惚深七篇真誥論仙
事一卷檀經說佛心此日盡知前境妄多生曾被外

塵侵自嫌習性猶殘處愛詠閒詩好聽琴

好聽琴

本性好絲桐塵機聞卽空一聲來耳裡萬事離心中
清暢堪銷疾恬和好養蒙尤宜聽三樂安慰白頭翁

愛詠詩

辭章諷詠成千首心行歸依向一乘坐倚繩牀閒自
念前生應是一詩僧

酬皇甫庶子見寄

掌綸不稱君應笑典郡無能我自知別詔忽驚新命
出同寮偶與夙心期春坊瀟洒優閒地秋髮蒼浪老
大時獨占二踈應未可能獲見擬覓分司

臥疾

閒官臥疾絕經過居處蕭條近洛河水北水南秋月
夜管絃聲少杵聲多

遠師

東宮白庶子南寺遠禪師何處遙相見心無一事時

問遠師

葷羶停夜食吟詠散秋懷笑問東林老詩應不破齋
小院酒醒

酒醒閒獨步小院夜深涼一領新秋簟三間明月廊
未收殘盞杓初換熱衣裳好是幽眠處松陰六尺床

贈侯三郎中

老愛東都好寄身足泉多竹少埃塵年豐最喜唯貧
客秋冷先知是瘦人幸有琴書堪作伴苦無田宅可

爲隣洛中縱未長居得且與蘇田遊過春

求分司東都寄牛相公十韻

忽忽心如夢星星髮侶絲縱貧長有酒雖老未拋詩
儉薄身都慣踈頑性頗宜飢粗食亦飽被暖起常遲
萬里歸何得三年伴是誰華亭鶴不去天竺石相隨
余罷杭州得華亭鶴
天竺石同載而歸王尹貴將馬田家賣與池開門
閒坐日遶水獨行時懶慢交游許衰羸相府知官寮
幸無事可惜不分司

酬楊八

君以曠懷宜靜境我因蹇步稱閒官閉門足病非高
士勞作雲心鶴眼看

履道新居二十韻

履道坊西角官河曲北頭林園四隣好風景一家秋
門閉深沉樹池通淺沮秋夜反溝拔青松直上鋪碧水
平流籬菊黃金合窓筠綠玉稠疑連紫陽洞侶到白
蘋洲僧至多同宿賓來輒少留豈無詩引興兼有酒
銷憂移榻臨平岬攜茶上小舟果穿聞鳥啄萍破見
魚遊地與塵相遠人將境共幽汎潭菱點鏡沉浦月
生鈎厨曉烟孤起庭寒雨半收老飢初暖粥瘦冷早
披裘洛下招新隱秦中忘舊遊辭章留鳳閣班籍寄
龍樓病慙官曹靜閒慙俸祿優琴書中有得衣食外
何求濟世才無取謀身智不周應須共心語萬事一
時休

九日思杭州舊遊寄周判官及諸客

忽憶郡南山頂上昔時同醉是今辰笙歌委曲聲延
耳企翠動搖光照身風景不隨官相去歡娛應逐使
君新江山賓客皆如舊唯是當筵換主人

秋晚

烟景澹濛濛池邊微有風覺寒螢近壁知暝鶴歸籠
長貌隨年改衰情與物同夜來霜厚薄梨葉半低紅
分司
散帙留司殊有味最宜病拙不才身行香拜表爲公
事碧洛青嵩當主人已出間遊多到夜却歸慵卧又
經旬錢塘五馬留三匹還擬騎遊攬擾春

河南王初到以詩代書先問之

別來王閣老三歲侶須更髮上斑多少杯前興有無

官從分緊慢情莫問榮枯許入朱門否籃輿一病夫

池西亭

朱欄映晚樹金魄落秋池還似錢塘夜西樓月出時

臨池閒臥

小竹圍庭匝平池與砌連閒多臨水坐老愛向陽眠
營役拋身外幽奇送枕前誰家臥床脚解繫釣魚船

吾廬

吾廬不獨貯妻兒自覺年侵身力衰眼下營求容足
地心中準擬挂冠時新昌小院松當戶履道幽居竹
遶池莫道兩都空有宅林泉風月是家資

題新居寄宣州崔相公

所居南隣
即崔家池

門庭有水巷無塵好稱閒官作主人冷侶崔羅雖少

客寬於蝸舍足容身踈通行徑將迎月掃掠莎臺欲
待春濟世料君歸未得南園北曲謾為隣

憶杭州梅花因叙舊遊寄蕭協律

三年閒悶在餘杭曾為梅花醉幾場伍相廟邊繁似
雪孤山園裡麗如粧蹋隨遊騎心長惜折贈佳人手
亦香賞自初開直至落歡因小飲便成狂薛劉相次
埋新寵沈謝雙飛出故鄉薛劉二客沈謝二妓
皆當時歌酒之侶歌伴
酒徒零散盡唯殘頭白老蕭郎

病中辱張常侍題集賢院詩因以繼和

天祿閣門開甘泉待從回圖書皆帝籍寮友盡仙才
騎省通中掖龍樓隔上臺猶憐病宮相詩寄洛陽來

早春晚歸

晚歸騎馬過天津沙白橋紅反照新草色連延多隙
地鼓聲閒緩少忙人還如南國饒溝水不似西京足
路塵金谷風光依舊在無人管領石家春

贈楊使君

曾嗟放逐同巴峽且喜歸還會洛陽時命到來須作
用功名未立莫思量銀銜叱撥欺風雪金屑琵琶費
酒漿更待城東桃李發共君沉醉兩三場

贈皇甫庶子

何因散地共徘徊人道君才我不才騎少馬蹄生易
蹶用稀印鑠澁難開妻知年老添衣絮婢報天寒撥
酒醅更愧小胥諮拜表單衫衝雪夜深來

池上竹下作

穿籬遶舍碧逶迤十晦閒居半是池食飽恣聞新睡
後脚輕林下獨行時水能性淡爲吾友竹解心虛卽
我師何必悠悠人世上勞心費目覓天知

閒出覓春戲贈諸郎官

年來數出覓風光亦不全閒亦不忙放鞍體安騎穩
馬隔袍身暖照晴陽迎春日日添詩思送老時時放
酒狂除却髭鬚白一色其餘未伏少年郎

別春爐

暖閣春初入溫爐興稍闌晚風猶冷在夜火且留看
獨宿相依久多情欲別難誰能共天語長遣四時寒

沉小輪二首

水一塘輪一隻輪頭漾漾知風起輪背蕭蕭聞雨滴

醉臥船中欲醒時忽疑身是江南客

二

船緩進水平流一莖竹篙剔船尾兩幅青幕覆船頭
亞竹亂藤多照岼如從鳳口向湖洲

夢行簡

天氣妍和水色鮮閒吟獨步小橋邊池塘草綠無佳
句虛臥春牕夢阿憐

題新居呈王尹兼簡府中三掾

弊宅須重葺貧家乏羨財橋憑川守造對倩府寮裁
朱板新猶濕紅英暖漸開仍期更携酒倚檻看花來

雲和

非琴非瑟亦非箏撥柱推絃調未成欲散白頭千萬

恨只銷紅袖兩三聲

春老

欲隨年少強遊春自覺風光不屬身歌舞屏風花障
上幾時曾畫白頭人

春雪過皇甫家

晚來籃輦雪中回喜遇君家門正開唯要主人青眼
待琴詩談笑自將來

崔侍御以孩子三日示其所生詩見示因以

二絕和之

洞房門上挂桑弧香水盆中浴鳳雛還似初生三日
魄嫦娥滿月卽成珠

二

愛惜肯將同寶玉喜歡應勝得王侯弄璋詩句多才
思愁殺無兒老鄧攸

與皇甫庶子同遊城東

閒遊何必多徒侶相勸時時舉一杯博望苑中無職
役建春門外足池臺綠油剪葉蒲新長紅蠟粘枝杏
欲開白馬朱衣兩官相可憐天氣出城來

洛城東花下作

記得舊詩章花多數洛陽舊詩云洛陽城東面今來
花侶雪又云更待城東桃
李發又云花
滿洛陽城及逢枝侶雪已是髮成霜向後光陰促
從前事意忙無因重年少何計駐時芳欲送愁離面
須傾酒入腸白頭無籍在醉倒亦何妨

晚春寄微之并崔湖州

洛陽陌上少交親履道城邊欲暮春崔在吳興元在
越出門騎馬覓何人

城東閒行因題尉遲司業水閣

閒遶洛陽城無人知姓名病乘籃輿出老著茜衫行
處處花相引時時酒一傾借君溪閣上醉詠兩三聲

寄皇甫七

孟夏愛吾廬陶潛語不虛花樽飄落酒風案展開書
隣女偷新果家僮漉小魚不知皇甫七池上興何如

訪皇甫七

上馬行數里逢花傾一杯更無停泊處還是覓君來

...

...

...

...

...

...

...

...



